

Date – 13/05/2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Upper Assam-a Rel kawng chhia vanga Hmarchhak state hrang hrangten tuialhtheia harsatna an tawh chuan ziaawm lam a la pan thei chiah lo.
2. Mizorama tleirawl leh rawlthar 14,170 te ruihhlo laka fihlim turin an intiam tawh.
3. May ni 7-a vote thlak Lok Sabha inthlan thawh 3-naah khan vote za-a 65.68 a tla.
4. Thla engemaw zat Covid-19 hrikai hmuhchhuah a nih tawh loh hnu-ah Manipur-ah hmuhchhuah leh a ni.

<><><>

### POL PROBLEM

Upper Assam-a Rel kawng chhia vanga Hmarchhak state hrang hrangten tuialhtheia harsatna an tawh chuan ziaawm lam a la pan thei chiah lo.

Aizawlah pawh nimina petrol pump inhawngahte tuialhthei lak tum an la intlar thui hle niin kan Corr. chuan a sawi a. Aizawl Treasury Sq-a Mizofed petrol pump Manager Pu Rohinliana chuan Diesel chu Silchar bul Monirbond Oil Depot-ah a thlen tawh thu sawiin, petrol phur turin tanker engemaw zat Guwahati-ah an chhuk thla, a ti a. Inrinni zan khan Mizofed petrol pump Treasury square-ah petrol litre Sing 2 leh MINECO pump-ah litre Sing 1 Sang 2 an hlan thlak thu sawiin, nimin tlai dar 5 thleng khan inhawngin chuta petrol dinhmun azirin vawiinah ‘free sale’ chhonzawm tur nge coupon neite chauh tan hralhchhuah tur tih thutlukna an siam dawn tih Pu Rohinliana hian a sawi a. Zaninah Vairengte atangin tanker an rawn thlen an beisei thu leh Diesel erawh an ‘free sale’ reng tur thu a sawi bawk.

Hauva petrol pump chuan petrol litre Sing 1 Sang 2 neiin vawiin atangin an ‘free sale’ ang a, diesel erawh an nei rih lo.

Zangena petrol pump-ah diesel an ‘free sale’ mek a ni.

Hetih lai hian Rel kawng hi siam that a nih tawh avangin reiloteah tuialhthei lak luh pawh a inphaman chho tura beisei a nih thu Mizoram sorkar chuan thuchhuah siamin a sawi a.

Sorkar thuchhuah tarlan dan chuan Mizoram aiin Tripura-in harsatna an tawh nasat zawk avangin rel-in tuialhthei a phurh hmasak pahnih chu Tripura tan zuah phawt a ni a, a pathumna chu IOCL hotuten Mizoram tan ni se, an ti a. Tuialhtheia harsatna tawh mekah mipuite lo chiai lo turin Food, Civil Supplies & Consumer Affairs Department chuan a ngen a. Petrol pump thenkhat, harsatna remchanga laa a hlawma ‘black’-a zawrh tur lo pe chhuak thin an awm tih hriat a ni tih sorkar thuchhuah chuan sawiin hemi vil tur hian

District hrang hranga FCS&CA Department, Deputy Commisisoner office leh SP office tangho te'n hma an la a, petrol pump-te CCTV footage thlengin en thin tur a ni, a ti.

Hetihlai hian Petroleum Entrepreneurs and Transport Union of Mizoram (PETUM) chuan Food, Civil Supplies & Consumer Affairs Department thuchhuah hi chhaglêtin, thu hriatna rintlak leh chhui chianna awm hmasa loin petrol pump neitute vaukhanna niawm tak thuchhuah an siam a, an trade licence cancel-sak hial tura hma lak a tum chu hriatthiam har an ti tih an sawi.

(Corr)

<><><>

## LAWNGTLAI – PAWNGPUI PHOTOGRAPHERS ASSN.

Phawngpui Photographer Association, Lawngtlai Member-te chuan Inrinni khan Lawngtlai khawpui chawmtu tuilakna chhehvel an thian fai.

Hnatlanga thawk chhuak mi 30 vel te chuan Chhimtuipuaia Chawngpawngli leh a chhehvela bawlhhlawh awm te chhar faiin heng bawlhhlawh an chharkhawm te hi a paihna hmunah paih leh vek a ni.

Phawngpui Photographer Association President Pu Vanlalzapa chuan Tuipui Ferry leh a chhehvel chu hawikhawthawn nan leh intihlim nan hman nasat a ni a, bawlhhlawh hnutchhiah a tamin heng bawlhhlawhte hi Lawngtlai tuilakna, Chengpawngli-ah luang lutin, Lawngtlai mipuite tui tlan chu a thianghlim lo hle tih sawiin, hei vang hian thenfai hna hi an thawk a ni, a ti a. Tuipui Ferry leh a chhehvel vawn thianghlim kawngah he lai tlawhtuten thehtawp chhuah se an duh tih a sawi bawk.

Lawngtlai khawpui tuilakna leh a chhehvel te, lui hnar leh lui dung thian fai hian pawl hrang hrang ten hnatlang an thawk fo thin a, Lawngtlai tui lak a thianghlim zual theih nan Chhimtuipui leh a fintu lui te vawn thianghlim a tul thu hi uar takin hnatlanga chhuakte hian an sawi thin a ni.

<><><>

## FIRE DAMAGES

Kumin January atanga March thla tawp thleng khan Mizoramah in kang 16 awmin kangmei vangin mi pahnihin nunna an chan.

Fire & Emergency Services-in a chhin chhiah dan chuan kumin kum tir thla thum chung khan in kang 16 leh ram kang tum 33 a thleng a. Kangmei vanga thi pahnih awmin hliam an awm lo thung a. Kangmei-in thil a tihchhiat hlut zawng hi Cheng Nuai 670 Sing 8 leh 332 a ni a, bungraw chhe tur chhanchhuah zat chu Cheng Nuai 603 Sing 7 Sang 7 a ni.

Fire & Emergency Services chhinchhiah dan chuan kum 2018 khan in kang 37 leh ram kang 56 awmin kangmei vanga hiam 14 an awm a. Kangmeiin thil a tihchhiat hlut zawng hi Cheng Nuai 924 Sing 3 Sang 3 leh 637 a ni a. Kum 2019 khan in kang 28 leh ram kang 16 awmin kangmei vanga thi pathum leh hliam pasarih an awm a. Kangmei thil tihchhiat hlut zawng hi Cheng Nuai 139 Sing 1 Sang 5 leh 930 a tling a. Kum 2020 khan in kang 37 leh ram kang 131 awmin kangmei vanga hliam pahnih an awm a. Kangmei thil tihchhiat hlut zawng hi Cheng Nuai 522 Sing 7 Sang 9 leh 768 nia chhut a ni.

Nikum khan in kang 31 leh ram kang 149 awmin kangmei vanga hliam panga an awm a. Kangmei thil tihchhiat hlut zawng hi Cheng Nuai 300 Sang 7 leh 800 nia chhut a ni.

<><><>

## CYBER CRIME

Cyber Crime Police Station (CCPS)-in kumin chhungin internet hmansual kaihnawih thubuaiah mi 11 an man tawh.

CCPS hotute hnen atanga thudawn danin, kumin January ni 1 atanga tun thla ni 7 thleng khan thubuai 21 an ziak lut tawh a, hemi kaihnawihah hian mi 11

an man tawh a. Heng thubuai an ziah luh zinga tam ber chu sum kaihnawiha inbumna a ni a, a dawttu chu hursualna kaihnawiha inbumna a ni a; a bak thubuai dang chu mi nihna ruksaka pawikhawih nana hman te, a neitu emaw a siam chhuaktu emaw phalna la hmasa loa video thehdarh thubuai te, hacking leh thubuai dangte a ni.

CCPS hian kum 2020 atanga tun thla ni 7 thlenga thubuai an ziah luh zawng zawng hi 288 a ni a; heng thubuai hrang hrangah hian mi 40 man tawhin, chung zinga mi 32 chu thiam loh chantir an ni tawh a. Hemi hun chhunga pawisaa inbumna thubuai an buaipuia sum an hmuh lêt chu Cheng vaibelche 1, Nuai 14, Sing 4, Sang 2 leh 303 a ni.

(Corr)

<><><>

## FOUNDATION FOR DRUG FREE MIZORAM

Mizorama tleirawl leh rawlthar 14,170 te ruihhlo laka fihlim turin an intiam tawh.

Ruihhlo laka Mizorama fihlim theih nana hmalatu tlawmngai pawl, Foundation For Drug-Free Mizoram chuan nimin chawhnu khan Aizawl Zuangtui Presbyterian Kohhran-a tleirawl inkhawm, Youth Christian Fellowship te chu ruihhlo that loh zia zirtirna an pe a. He hunah hian Dr. Donna Tochwawng chuan mihringin a hneh theih tawh loh chin a thlen chuan chu dinhmunah chuan a intulut fel tawh tihna a ni a; hei hi hriain taksa, rilru leh thlarau tichhe thei ruihhlo laka fihlim turin tleirawlte a sawm a. Miss Mizoram 2024 Runner Up Evelyn Zachhingpuii kaihhruaiin tleirawl leh rawlthar mi 109 te chu ruihhlo laka fihlim turin an intiam a ni.

Foundation For Drug-Free Mizoram hian kum 5 chhungin Mizoram chhung hmun 72-ah rawngbawlina an kalpui tawh a, an rawngbawlinaah hian tleirawl leh rawlthar mi 14,170 te ruihhlo laka fihlim turin an intiam tawh a ni.

<><><>

## SERCHHIP – MURDER?

Serchhip Dist-a Khawlailung khaw High School Venga cheng Pi Veronica Lalkrawsthangin kum 34 chu a pasal Lalthlangkima'n Zirtawp zan khan a sawisa hlum nia hriat a ni.

Lalthlangkima hian a nupui Pi Veronica-i hi nimin zing khan a kai tho zo lo tih a pizawn Pi H.Lallianzeli phone-in a hrilh a. Ngun taka belh chian a nih hnuah kut thlak ni theia a lan avangin Pi Zeli te hian Police-a report an tum thu an sawi a. Hei hi ngaingam lovin Lalthlangkima hian zan lama kut a thlak thu leh a tum aia naa a khawih vanga thi a nih theih thu sawiin a inpuang a. North Vanlaiphai Police ten Lalthlangkima hi thu zawh fiah atan an la a ni.

Hetihlai hian nimin chawhnu khan Serchhip chhim veng rawlthar 2 Bike chesualah an thi bawk.

Chesuala boral ta Lalvensanga kum 20, Pu Vanlalpeka fapa leh Lalmuanzuala Pu Lalvawnliana (L) fapa, Serchhip Chhim veng ve ve te hi nu te unau niin, nimin chawhnu khan Serchhip atanga KM 20-a hla Thingmunkawn vel, Chhingchhip chhim lam NH-54 kawng siam tharah anmahni Bike ve vein an flan a. Chak taka flan, pakhat kual thut chu a hnunga miin a su niin Serchhipa kan corr thulakna chuan a sawi a. Mi tlawmngaiten Serchhip Damdawi an panpui hnuah an hliam tuar lovin an boral a ni.

<><><>

## 4<sup>TH</sup> PHASE CAMPAIGN ENDS TODAY

Tukin atangin Lok Sabha inthlan thawh lina atan vote thlak tan a ni a. Zing dar 7 atanga flai dar ruk thleng vote thlak a ni ang.

Inthlan thawhli naah hian state pakua leh Union Territory pakhata Lok Sabha seat 96 ah inthlan a ni a. Voter vaibelchhe 17.70 chuang awmin an zingah hian mipa vaibelchhe 8.97 an awm a. Hmeichhe voter hi vaibelchhe 8.73 vel an awm bawk a ni.

Inthlan thawh lina neihna te hi Andhra Pradesh ah seat 25, Telangana ah 17, Uttar Pradesh ah 13, Maharastra ah 11, Madhya Pradesh leh West Bengalah 8 ve ve, Bihar ah panga, Jharkhand leh Odisha ah pali leh Jammu and Kashmir ah seat 1 te an ni a.

Candidate langsar zingah Union Minister leh BJP hruaitu Giriraj Singh, Arjun Munda, G Kishan Reddy, Ajay Kumar Mishra, JDU hruaitu rajiv Ranjan Singh, Samajwadi hotupa Akhilesh Yadav, Congress hruaitu Adhir Ranjan Chowdhury, TMC atangin Mahua Moitra leh Shatrugan Sinha leh AIMIM hotupa Asaduddin Owaisi te an tel a ni.

<><><>

## RAIN HAVOC

Ruahsur nasa avangin Indonesia, Brazil leh Afghanistan mipuiten tuilian nasa tak an tuar mek.

Indonesia ah chuan West Sumatra ah tuilian leh leimin avangin mi 25 an thi tawh a. Mi pali chin hriatlohin an bo a. National Disaster management agency chuan inrinni atanga tuilian chuan Tanah Datar regency ah leimin a nasa tih sawiin district panga in harsatna an tuar a ti a. Chenna in 84 leh lei 16 a chhia a, hei vang hian chhanchhuah hna pawh a khaihlak niin a sawi.

Afghanistan ah chuan mi 315 tuilian avangin an thi a, mi 1600 chuangin hliam an tuar a. Province tam takah emergency puan a ni a. Chhanchhuah hna thawktute chuan tun aia chhiatna nasa zawk a thlen an hlauh thu an sawi a. Ruahsur nasa hian khawchhung hmun tam takah chirh leh dum len lutin thlai chinna hmunte a chhe nasa hle a, chenna in tam tak a ti chhe bawk a ni.

Brazil ah pawh ruahsur nasa avangin hmun tam takah tui a lian a. Chhiatna hrang hrang thlengah mi 136 an thi tawh a. Mi 806 in hliam an tuar a, mi 125 chin hriatlohin an bo a ni. Tuilian avang hian mi maktaduai 2 chaungin harsatna an tawk a, mi nuai 5 sing 3 leh sang 7 chuang hmun him lamah sawn chhuah an ni a, Chenna in 91000 chuang a chhe tawh a ni.

<><><>